

**SOALAN NO. 154**

**PEMBERITAHUAN PERTANYAAN BAGI JAWAB BUKAN LISAN**

**MESYUARAT KETIGA, DEWAN RAKYAT**

**PENGGAL KELIMA, PARLIMEN KETIGA BELAS**

**MAJLIS MESYUARAT DEWAN RAKYAT**

**PERTANYAAN : BUKAN LISAN**

**DARIPADA : TAN SRI DATUK SERI PANGLIMA HAJI  
ANNUAR BIN MUSA [KETEREH]**

**TARIKH : 23 OKTOBER 2017 (ISNIN)**

**SOALAN :**

**Tan Sri Datuk Seri Panglima Haji Annuar Bin Musa [Ketereh] minta  
MENTERI PEMBANGUNAN WANITA, KELUARGA DAN MASYARAKAT  
menyatakan kejayaan program rintis Program Pemisah 2 Tahun (2YEP)  
dalam usaha mengurangkan kebergantungan kepada Kerajaan melibatkan  
ibu tunggal dan orang kurang upaya (OKU) dan apakah perancangan bagi  
meneruskan program ini di seluruh negara.**

152

**JAWAPAN: YB DATO' SRI ROHANI ABDUL KARIM, MENTERI**  
**PEMBANGUNAN WANITA, KELUARGA DAN**  
**MASYARAKAT**

Tuan Yang Dipertua,

Kementerian Pembangunan Wanita, Keluarga Dan Masyarakat melalui Jabatan Kebajikan Masyarakat (JKM) sentiasa berusaha membangun dan memperkasa penerima bantuan produktif termasuklah ibu tunggal dan orang kurang upaya (OKU) miskin ke arah peningkatan ekonomi agar mampu berdikari dan keluar daripada kepompong kemiskinan tanpa bergantung kepada bantuan kerajaan untuk saraan hidup melalui *2Years Exit Programme (2YEP)*.

Melalui 2YEP penerima bantuan produktif yang telah melepasi saringan ujian penaksiran psikologi (meliputi ujian motivasi, personaliti dan ujian minat kerjaya) akan dibimbing dan diperkasa dalam tempoh dua (2) tahun dalam bidang pekerjaan atau projek penjanaaan pendapatan yang sesuai dengan

minat dan kemahiran yang dimiliki oleh mereka.

Program ini sangat menekankan konsep bimbingan yang berterusan daripada pegawai kes kepada peserta 2YEP melalui pendekatan kerja sosial (kerja kes, kerja kumpulan dan kerja komuniti) agar kefungsi sosial penerima bantuan dapat ditingkatkan. Kolaborasi pelbagai agensi kerajaan, swasta, sektor korporat, NGO dan orang perseorangan juga ditekankan dalam aspek pembangunan modal insan dalam pelaksanaan 2YEP.

Mereka diberi latihan dan kemahiran yang bersesuaian dengan kecenderungan dan minat kerjaya mereka, dilibatkan secara aktif dalam pekerjaan samada bekerja dengan majikan atau bekerja sendiri melalui penjana pendapatan dengan pemberian Bantuan Geran Pelancaran (BGP) dengan kadar maksimum RM2,700 sekaligus. Selain itu melalui 2YEP juga peserta yang terlibat akan dirujuk ke agensi dan Jabatan berkaitan untuk mendapatkan khidmat nasihat pakar dalam bidang yang diceburi ataupun untuk mendapatkan pinjaman mikro kredit bagi pengembangan perniagaan yang dijalankan.

Program 2YEP telah dijalankan secara rintis pada tahun 2014 di dua buah negeri iaitu di Negeri Sembilan dan Perlis dengan penglibatan seramai 500

penerima bantuan produktif. Daripada jumlah tersebut 294 orang dalam kalangan ibu tunggal dan 88 orang adalah OKU. Dalam tempoh tersebut seramai 122 orang penerima berjaya menjana pendapatan melebihi RM1500 ke atas sebulan dan mampu berdikari tanpa bantuan bulanan JKM. Pada tahun 2016 (melalui RMKe-11), 2YEP diperluaskan ke seluruh negara mulai dengan penglibatan 2002 orang penerima bantuan produktif. Daripada jumlah tersebut seramai 569 adalah OKU.

Sehingga September 2017, seramai 425 peserta (21.22%) telah berjaya menjana pendapatan di antara RM1500 hingga RM10,000 ke atas sebulan dan mampu berdikari tanpa bantuan bulanan JKM. Daripada 425 orang tersebut, seramai 17 orang berjaya menjana pendapatan melebihi RM10,000 hingga RM100,000 sebulan, walaupun asalnya mereka adalah golongan miskin yang berkeperluan.

Bagi meneruskan kesinambungan kejayaan tersebut, mereka akan dilibatkan dalam program "*client support group*" pada tahun 2018 akan datang iaitu menjadi pembimbing, pemudahcara dan mentor kepada penerima bantuan lain yang masih belum berjaya berdikari. Daripada program tersebut, sebanyak RM1.4 juta setahun peruntukan bantuan dapat dijimatkan dan disalurkan kepada individu lain yang lebih memerlukan

bantuan JKM. 2YEP akan diteruskan pelaksanaannya pada tahun 2018 di bawah projek pembangunan bukan fizikal RMKe-11.